


欽定古今圖書集成

方輿彙編職方典



欽定古今圖書集成方輿彙編職方典
第五百二十一卷目錄
西安府部紀事

職方典第五百二十一卷

西安府部紀事

史記五帝本紀黃帝南至于江登熊湘注封禪書曰

南伐至于召陵登熊山地理志曰湘山在長沙益陽縣正義曰括地志云熊耳山在商州洛陽西齊桓公登之以望江漢也湘山一名編山在岳州巴陵縣南雒南縣志黃帝時有鳳銜丹書圖見於元扈山帝拜受之帝王世紀謂黃帝有土德之瑞卽此黃帝感風后言祭于洛水見大魚七日流于海始得

河圖玉版倉帝書成龍藏鬼哭以有文字恐人書之也天爲雨粟雨金以其洩天地之祕也

竹書紀年唐堯五十八年使后稷放子朱于丹水故曰丹朱一百年堯崩朱避舜于房陵舜讓不克遂封于房爲虞賓

淳化縣志唐堯鑿山爲門

商州志大禹時元龜負文出洛水禹受之叙洪範淳化縣志夏禹導汧及岐至于荆山

鄠縣志周文王因崇侯譖囚於羑里後得釋封西伯遂伐崇作豐宮

武王繼文雖都鎬而豐宮不移記曰文武郊于豐成王十七年周公請老於豐

藍田縣志平王東遷白鹿見於西原

商州志定王二十一年梁山崩壅河三日不流晉侯名伯宗伯宗遇輦者曰君親縞素率群臣哭之斯流矣如其言而河流

元王六年丹水絕三日不流

古今圖書集成
貞定王十二年河出龍門三里

考王二年河赤於龍門三日

威烈王三年河岸崩壅龍門

二十三年九鼎震河岸崩壅龍門

顯王元年冬桃李花於秦

三年雨金於櫟陽

周亡秦昭王取九鼎其一飛入泗水餘八入于秦中
渭南縣志晉惠公四年薦饑乞糴於秦秦穆公輸粟
於晉自雍相望至絳命曰汎舟之役

史記秦始皇本紀始皇徙天下豪富于咸陽十二萬
戶諸廟及章臺上林皆在渭南秦每破諸侯寫放其
宮室作之咸陽北阪上南臨渭自雍門以東至涇渭
殿屋複道周閣相屬所得諸侯美人鍾鼓以充入之
二十七年作信宮渭南已更命信宮爲極廟象天極
自極廟道通酈山作甘泉前殿築甬道自咸陽屬之
是歲賜爵一級治馳道

淳化縣志始皇收河南地因河爲塞築四十四縣城
臨河徙適戍以充之而通直道自九原至雲陽徙五

古今圖書集成
萬家於雲陽

三十五年欲游天下道九原直抵甘泉乃使蒙恬通道自九原塹山堙谷千八百里道未就而行出

二世胡亥起林光宮從廣各五里

樗里子傳樗里子卒葬于渭南章臺之東曰後百歲是當有天子之宮夾我墓樗里子疾室在于昭王廟西渭南陰鄉樗里故俗謂之樗里子至漢興長樂宮在其東未央宮在其西武庫正直其墓秦人諺曰力則任鄙智則樗里

漢書高帝本紀沛公至霸上秦王子嬰素車白馬繫頸以組降枳道旁

注

應劭曰霸上地名在長安東三

十里古曰茲水秦穆公更名霸師古曰霸水上故曰霸上卽今所謂霸頭蘇林曰枳道亭名也在長安東十三里師古曰在霸成觀西四里

漢元年沛公西入咸陽或說沛公曰秦富十倍天下地形強今聞章邯降項羽羽號曰雍王王關中卽來沛公恐不得有此可急使守函谷關毋內諸侯軍稍徵關中兵以自益距之沛公然其計從之十二月羽

古今圖書集成
果帥諸侯兵欲西入關關門閉聞沛公已定關中羽大怒使黥布等攻破函谷關遂至戲下

渭南縣志漢元年沛公謝羽鴻門注鴻門在新豐境內新豐爲渭南舊縣名時羽兵四十萬沛公兵僅十萬

漢書婁敬傳敬齊人漢五年戍隴西過雒陽高帝在焉敬脫輓輅願見上上召見賜食已而問敬敬說曰陛下都雒陽豈欲與周室比隆哉上曰然敬曰陛下王天下與周異周之先自后稷堯封之邰積德累善

十餘世公劉避桀居豳大王以狄伐故去豳杖馬箠去居岐國人爭歸之及文王爲西伯斷虞芮訟始受命呂望伯夷自海濱來歸之武王伐紂不期而會孟津上八百諸侯遂滅殷成王卽位周公之屬傅相焉迺營成周都雒以爲此天下中諸侯四方納貢職道里鈞矣有德則易以王無德則易以亡凡居此者欲令務以德致人不欲阻險令後世驕奢以虐民也及周之衰分而爲二天下莫朝而周不能制非德薄形勢弱也今陛下起豐沛收卒三千人以之徑往卷蜀

漢定三秦與項籍戰滎陽大戰七十小戰四十使天下之民肝腦塗地父子暴骸中野不可勝數哭泣之聲不絕傷夷者未起而欲比隆成康之時臣竊以爲不侔矣且夫秦地被山帶河四塞以爲固卒然有急百萬之衆可具因秦之故資甚美膏腴之地此所謂天府陛下入關而都之山東雖亂秦故地可全而有也夫與人鬪不搯其亢拊其背未能全勝今陛下入關而都按秦之故此亦搯天下之亢而拊其背也高帝問群臣群臣皆山東人爭言周王數百年秦二世

則亡不如都周上疑未能決留侯明言入關便即日駕西都關中

史記項羽傳羽屠咸陽燒其宮室收其寶貨略婦女而東秦民失望於是韓生說羽曰關中阻山帶河四塞之地肥饒可都以伯羽見秦宮室皆已燒殘又懷思東歸曰富貴不歸故鄉如衣錦夜行韓生曰人謂楚人沐猴而冠果然羽聞之烹韓生

張良傳劉敬說上都關中上疑之左右大臣皆山東人多勸上都雒陽雒陽東有成臯西有殽黽背河鄉

古今圖書集成
雜其固亦足恃良曰雒陽雖有此固其中小不過數
百里田地薄四面受敵此非用武之國夫關中左崕
函右隴蜀沃野千里南有巴蜀之饒北有胡苑之利
阻三面而固守獨以一面東制諸侯諸侯安定河渭
漕輓天下西給京師諸侯有變順流而下足以委輸
此所謂金城千里天府之國劉敬說是也於是上卽
日駕西都關中

高祖本紀六年十二月人有上變事告楚王信謀反
上問左右左右爭欲擊之用陳平計乃僞遊雲夢會
諸侯于陳楚王信迎卽因執之是日大赦天下田肯
賀因說高祖曰甚善陛下得韓信又治秦中秦形勝
之國帶山河之險縣隔千里持戟百萬秦得百二焉
地勢便利其以下兵于諸侯譬猶居高屋之上建瓴
水也夫齊東有琅琊卽墨之饒南有泰山之固西有
濁河之限北有勃海之利地方二千里持戟百萬縣
隔千里之外齊得十二焉故此東西秦也非親子弟
莫可使王齊矣高祖曰善賜黃金五百斤注應劭曰
山河之險與諸侯相縣隔地絕千里所以能禽諸侯

古今圖書集成
者得天下之利百二也李斐曰河山之險由地勢高
順流而下易故天下于秦懸隔千里持戟百萬秦得
百二焉蘇林曰得百中之二焉秦地險固二萬人足
當諸侯百萬人也索隱曰服虔云謂函谷關去長安
千里爲懸隔按又以河山險固形勝其勢如隔千里
虞喜云百二者得百之二言諸侯持戟百萬秦地險
固百倍于天下故云得百二焉言倍之也蓋言秦兵
當二百萬也齊得十二亦如之故爲東西秦言勢相
敵但互文相避故云十二言餘諸侯十萬齊地形號

亦倍于他國當二十萬人

史記劉敬從匈奴來因言匈奴河南白羊樓煩主去
長安近者七百里輕騎一日一夜可以至秦中新破
少民地肥饒可益實夫諸侯初起時非齊諸田楚昭
屈景莫能與今陛下雖都關中實少人一日有變陛
下亦未得高枕而臥也臣願陛下徙齊諸田楚昭屈
景燕趙韓魏後及豪桀名家居關中此疆本弱末之
術也上曰善乃使劉敬徙所言關中十餘萬口注索
隱曰案小顏云今高陵櫟陽諸田華陰好畤諸景及

三輔諸屈諸懷尚多在此時所徙

漢書高祖本紀十一年夏四月行自雒陽至今豐人

徙關中者皆復終身注應劭曰太上皇思故土欲歸

豐高祖乃更築城寺市里如豐縣號曰新豐徙豐民

以充實之師古曰徙豐人所居卽今之新豐古城是

其處

通志惠帝四年未央宮凌室災丙子織室災

三輔黃圖漢之故都高祖七年方修長安宮城自櫟

陽徙居此城本秦離宮也初置長安城本狹小至惠

帝更築之元年正月初成長安城三年春發長安六

百里內男女十四萬六千人三十日罷城高三丈五

尺下闊一丈五尺六月發徒隸二萬人常役至五年

復發十四萬五千人三十日乃罷九月城成高三丈

五尺下闊一丈五尺上闊九尺雉高三版周迴六十

五里城南爲南斗形北爲北斗形至今人呼漢京城

爲斗城是也

西京雜記惠帝七年夏雷震南山大木數千株皆火

燃至末其下數十畝地草皆焦黃其後百許日人家

古今圖書集成
就其間得龍骨一具鮫骨二具

咸寧縣志呂后既殺戚夫人酖趙王如意後行軹道上見黑犬傷腋卜之曰趙王如意爲祟

通志文帝初多雨積霖至百日而止

七年六月癸酉未央宮東闕罌罌災

後元三年藍田山水出流九百餘家壞民室八千餘所沒三百餘人

鄠縣志武帝建元二年始微行與左右能騎射者期諸殿門常入南山下射獵馳驚禾稼之地民皆號呼

罵詈鄠杜令欲執之示以乘輿物乃得免

雒南縣志漢武帝建元三年上欲使吾丘壽王除上林苑屬之南山東方朔諫曰夫南山天下之阻陸海之地山出玉石金銀銅鐵良材百工所取給萬民所仰足也又有秔稻梨栗桑麻竹箭之饒土宜薑芋水多蠶魚貧者得以給足無饑寒之憂

六年四月壬子高園便殿火

渭南縣志漢武帝元光六年大司農鄭當時言異時關東漕粟從渭中上度九百餘里時有難處引渭穿

古今圖書集成
渠起長安並南山下至河三百餘里徑易漕度又可
溉渠下民田萬餘頃天子然之發卒數萬人穿渠三
歲而通人以為便

通志元狩元年十月祠五時獲一角獸以燎

淳化縣志二年遣驃騎將軍霍去病擊匈奴得休屠
祭天金人祠諸甘泉以為天神主

元鼎四年六月汾陰巫錦得大鼎河東太守以聞天
子使驗問巫得鼎無姦詐乃以禮祠迎鼎至甘泉薦
之宗廟及上帝藏於甘泉宮羣臣皆上壽賀

五年上幸甘泉立太一祠壇所用祠具如雍一時而
有加焉五帝壇環居其下後嬖臣李延年以好音見
帝善之下公卿議曰古者祠天地皆有樂而神祇可
得而禮乃立樂府以延年為協律都尉論律呂合八
音之調作十九章之歌以正月上辛用事甘泉園丘
使童男女七十人俱歌皆祠至明夜嘗若有神光如
流星止集於祠壇天子自竹宮遙拜百官侍祠者數
百人皆肅然心動

元封元年帝行自雲陽北歷上郡西河五原出長城

古今圖書集成
北登單于臺至朔方還祭黃帝冢橋山迺還甘泉祠
太一又令民能入粟甘泉各有差以復終身不告緡
一歲之中甘泉倉滿

二年作甘泉通天臺從公孫卿仙人好樓居之言也
夏六月詔曰甘泉宮內中產芝九莖連葉上帝博臨
不異下房賜朕弘休其赦天下母自復作賜雲陽都
百戶牛酒作芝房之歌冬十二月帝還祠太一拜德
星

同州志四年幸河東祀后土赦夏陽死罪以下及免

今年租賦

太初元年冬十一月柏梁臺災祀后土東臨渤海望
祀蓬萊春還受計於甘泉

西京雜記武帝作昆明池欲伐昆吾夷教習水戰因
而于上游戲養魚魚給諸陵廟祭祀餘付長安市賣
之池周迴四十里

京師大水祭山川以止雨丞相御史二千石禱祠如
求雨法

瓠子河決有蛟龍從九子自決中逆上入河噴沫流

古今圖書集成
波數十里

咸寧縣志漢昆明池畔有靈沼名神池有人鉤得大魚絕綸而去魚夢於武帝求去其鉤明日帝遊昆明池見大魚銜鉤帝曰是豈昨所夢乎取魚去鉤而放之間三日帝復遊池濱得明月珠一雙帝曰豈魚之報耶

淳化縣志天漢四年春正月朝諸侯王於甘泉宮發天下七科

通志四年二月雍無雲如雷者二黑霧如鷲隕石于

雍一聲聞四百里夏蝗

太始元年徙郡國吏民豪傑於雲陽

三年春正月行幸甘泉宮饗外國客令天下大酺五日

征和二年帝行幸甘泉巫蠱起黃門蘇文亡歸甘泉言狀

酉陽雜俎漢武帝鑿昆明池極深悉是灰墨無復土舉朝不解以問東方朔朔曰臣愚不足以知之曰試問西域人帝以朔不知難以移問至後漢明帝時西

古今圖書集成
域道人入來洛陽時有憶方朔言者乃試以武帝時
灰墨問之道人云經云天地大劫將盡則劫燒此劫
燒之餘也乃知朔言有旨

淳化縣志昭帝始元元年夏爲太后起原廟雲陵

三年秋募民徙雲陵

四年春三月甲寅徙三輔富人於雲陵賜錢戶十萬
元鳳元年九月通天臺自毀椽木皆化龍鳳隨風雨
飛去

三年正月上林僵柳復起生有蟲食其葉成文字曰

公孫病已立

四年五月丁丑孝文廟正殿火

淳化縣志宣帝神爵元年春正月帝如甘泉郊泰時
遣諫大夫王褒求金馬碧鷄之神

二年正月上行幸甘泉郊見泰時數有美祥修武帝
故事盛車服敬齊祠之禮頗作詩歌

四年上行幸甘泉郊泰時有神雀五采集甘泉泰時
殿詔曰迺者鳳凰甘露降集京師嘉瑞並見修興太
一五帝后土之祠祈爲百姓蒙祉福鸞鳳萬舉蜚覽

古今圖書集成
翔翔集止於旁齋戒之暮神光顯著薦鬯之夕神光
交錯或降於天或登於地或從四方來集於壇上帝
嘉饗海內承福其赦天下

五鳳五年鸞鳳集長樂宮東闕中樹上飛下止地文
章五色

甘露元年甘露降四月甲辰孝文廟火建章未央長
寧宮鐘簾銅人皆生毛長寸許

二年行幸甘泉郊泰時匈奴呼韓邪單于遣子右賢
王銖婁渠堂入侍

三年春正月行幸甘泉郊泰時匈奴呼韓邪單于稽
俛姍來朝贊謁稱藩臣而不名賜以璽綬冠帶衣裳
安車駟馬黃金錦繡繒絮使有司遣單于先行就邸
長安宿長平上自甘泉宿池陽宮上登長平阪詔單
于毋謁

宣帝微時好游俠上下諸陵尤樂鄠杜之間甘露三
年十二月嘗幸萑陽宮

黃龍元年上行幸甘泉郊泰時呼韓邪單于來朝
關中記宣帝少依許氏長於杜縣樂之後葬於南原

古今圖書集成
立廟於曲池之北亭曰樂遊原

淳化縣志元帝初元元年卽位遵舊制間歲正月一幸甘泉郊泰時施恩澤惠事所過毋出田租

二年正月行幸甘泉郊泰時賜雲陽民爵一級女子百戶牛酒

建昭元年八月白蛾群飛蔽天從東都門至于軹道四年六月藍田地震山崩壅灞水安陵岸崩壅涇水逆流

通志成帝建始元年四月辛丑夜西北有火光壬寅

大風從西北起雲氣赤黃四塞上下六月有青蠅無萬數集未央殿中大風拔甘泉時中大木十圍以上淳化縣志建始元年作長安南郊罷甘泉祠從丞相匡衡御史大夫張譚之奏也

三年大雨三十餘日沒四千餘人壞官民舍八萬四千餘所九月長安城南有鼠銜黃蒿柏葉上榆爲巢衛后園桐柏上巢尤多十二月戊申未央宮地震

河平元年四月白茅谷水溢壞郃陽縣鴻嘉二年春行幸雲陽三月博士行飲酒禮有雉蜚

古今圖書集成
集於庭歷階升堂而雒復集諸府又集承明殿
三年正月乙亥大水五月乙亥大水南山鳴如雷聞
三百四十里野鷄皆鳴

永始元年九月丁巳晦日食京師見之四方不見

三年冬十月庚辰皇太后詔有司復甘泉泰畤

通志永始四年春正月行幸甘泉郊泰畤神光降集
紫殿大赦天下賜雲陽吏民爵女子百戶牛酒鰥寡
孤獨高年帛四月癸未長樂宮臨華殿東司馬門災
元延元年正月長安章城門門牡自亡四月丁酉無

雲而雷七月辛未星孛于東井

淳化縣志元延二年春正月行幸甘泉郊泰畤詔揚
雄待詔承明之殿正月從上甘泉還奏甘泉賦以諷
之

通志綏和二年春正月行幸甘泉郊泰畤三月帝崩
皇太后詔有司曰皇帝卽位思順人心尊經義定郊
禮天下說憲懼未有皇孫故復甘泉泰畤汾陰后土
庶幾獲福皇帝恨難之卒未得其祐其復南北郊長
安如故以順皇帝之意也

古今圖書集成
長安縣志漢成帝時劉向校書天祿閣專精覃思夜有老人著黃衣杖青藜吹杖端烟見向授以五行洪範之文向乃製牒以記其言至曙而去問其姓名曰我是太乙之精天帝聞卯金之子有博學者下而觀焉乃出懷中竹策有天文地圖之書
哀帝建平三年寢疾乃令太皇太后詔有司曰皇帝孝順奉承聖業靡有懈怠而久疾未瘳夙夜維思殆繼體之君不宜改作其復甘泉泰畤汾陰后土祠如故上亦不能親至遣有司行事而禮祠焉

四年四月山陽湖陵天雨血廣三尺長五尺大者如錢小者如麻子

元壽元年九月孝元廟門銅龜蛇鳴

平帝元始元年六月乙未義陵寢神衣在柙中丙申旦衣在外牀上又長安女子生兒兩頭異頸面相向四臂尻上有目長二寸

三年正月天雨草長平館西岸崩壅涇水不流毀而北行十月戊辰王路朱鳥門鳴
五年復南北郊罷甘泉祠

古今圖書集成
新莽地皇三年二月灞橋災夏飛蝗蔽天從東方來
至長安入未央宮緣殿閣草木盡食之

西京雜記杜子夏葬長安北四里臨終作文曰魏郡
杜鄴立志忠款犬馬未陳奄先草露骨肉歸於后土
魂氣無所不之何必故丘然後卽化封於長安北郭
此焉宴息及死命刊石埋於墓側墓前種松柏樹五
樹至今茂盛

漢朝輿駕祠甘泉汾陰備千乘萬騎太僕執轡大將
軍陪乘名爲大駕

通志世祖建武二年關中大饑人相食黃金一斤易
豆五升九月大雨連月禾稼更生鼠巢樹上

同州志建武十八年幸長安歷馮翊進幸蒲坂祀后
土

安帝延光三年鳳凰集於新豐

順帝永和五年徙上郡居夏陽避羌寇

六年徙北地居馮翊

桓帝延熹元年七月乙巳左馮翊雲陽地裂

獻帝初平四年六月華山崩裂

古今圖書集成
後漢書陳紀傳紀爲平原相往謁董卓時欲徙都長安乃謂紀曰三輔平敞四面險固土地肥美號爲陸海今關東兵起恐洛陽不可久居長安猶有宮室今欲西遷何如紀曰天下有道守在四夷宜修德政以懷不附遷移至尊誠計之末者愚以公宜事委公卿專精外任其有違命則威之以武今關東兵起民不堪命若謙遠朝政率師討伐則塗炭之民庶幾可全若欲徙萬乘以自安將有累卵之危崢嶸之險也卓意甚忤而敬紀名行無所復言

朝邑縣志漢莊熊言臨晉民願穿洛漑重泉以東萬餘畝使斥鹵畝入一鍾發卒萬餘人穿渠引洛至商顏下乃止

漢東觀志漢王阜爲重泉令鸞鳥集止學宮阜令掾吏疊爲雅奏擊磬鸞舉足垂翼應聲而飛舞又止縣舍徘徊十餘日乃去

董卓傳卓結壘於長安城東以自居又築塢于郿高厚七丈號曰萬歲塢積穀爲三十年儲自云事成雄據天下不成守此足以畢老

古今圖書集成
淳化縣志三國魏司馬宣王撫慰關中罷雲陽爲縣以其地置撫夷護軍

銅官縣志魏太和八年令銅官以麻布充稅

長安縣志魏明帝青龍中長安金狄泣承露盤折聲聞數十里明帝盛修宮室之異也

咸寧縣志晉太康五年白龍見霸上

藍田縣志惠帝時關中大饑藍田出竹米人皆以療饑

淳化縣志西晉元康初趙王倫遷征西將軍開府儀

同三司鎮關中復罷護軍刑賞失中氏羌反又立護軍

咸寧縣志愍帝時有玉龜出灞水

元帝太興四年五月終南山崩

通志建元中徙烏丸雜類於馮翊

西京雜記楊貴字王孫京兆人也生時厚自奉養死卒裸葬于終南山其子孫掘土鑿石深七尺而下屍上復蓋之以石欲儉而反奢也

通志前趙劉曜時終南山崩得白玉方一尺有文字

苻秦時高陵人穿井得龜大三尺背有八卦長安大風拔宮中樹晝暝恆星見

苻堅於嶽薛山北永安鎮置三元護軍卽姚萇宮三原故縣地也今在本縣境迤西有孟侯原

同州志苻堅永興中自臨晉登龍門顧謂其群臣曰美哉山河之固婁敬有言關中四塞之國真不虛也

權翼薛讚以在德不在險對堅大悅乃還長安丐所過田租之半

晉書苻堅以關中水旱不時議依鄭白故事發其王

侯已下及豪望富室僮隸三萬人開涇水上源鑿山起堤通渠引瀆以溉岡鹵之田及春而成百姓賴其利

晉書赫連勃勃載紀勃勃歸于長安徵隱士京兆韋祖思既至而恭懼過禮勃勃怒遂殺之羣臣勸都長安勃勃曰朕豈不知長安累帝舊都有山河四塞之固但荆吳僻遠勢不能爲人之患東魏與我同壤境去北京裁數百餘里若都長安北京恐有不守之憂朕在統萬彼終不敢濟河諸卿適未見此耳其下咸

曰非所及也乃于長安置南臺以瓚領大將軍雍州牧錄南臺尚書事勃勃還統萬以宮殿大成於是赦其境內又改元曰真興刻石都南頌其功德

宋書廬陵王義真傳關中平定高祖議欲東還而諸將行役既久咸有歸願止畱偏將不足鎮固人心乃以義真行都督雍涼秦三州之河東平陽河北三郡諸軍事安西將軍領護西戎校尉雍州刺史太尉諮議參軍京兆王修爲長史委以關中之任高祖將還三秦父老詣門流涕訴曰殘民不沾王化於今百年

矣始覩衣冠方仰聖澤長安十陵是公家墳墓咸陽宮殿數千間是公家屋宅捨此欲何之高祖爲之愍然慰譬曰受命朝廷不得擅留感諸君戀本之意今畱第二兒令文武賢才共鎮此境臨還自執義真手以授王修令修執其子孝孫手以授高祖義真尋除正加節又進督并東秦二州司州之東安定新平二郡諸軍事領東秦州刺史時隴上流人多在關中望因大威復得歸本及置東秦州父老知無復經略隴右固關中之意咸共歎息

古今圖書集成
同州志北魏孝文帝太和二十一年四月由龍門蒲坂幸長安遣侍臣分省縣邑賑賜穀帛五月東旋泛渭入河

通志北魏孝明帝正光二年八月始平郡地開成井涇陽縣志北周武帝建德三年七月霖雨三旬時衛刺王直潛謀逆亂屬帝幸雲陽宮以其徒襲肅章門尉遲綱逆拒破之其日雨霽

淳化縣志北周尉遲綱嘗從太祖北狩雲陽值五鹿俱起綱獲其三

賀若敦嘗從太祖校獵於甘泉宮時圍人不齊獸多逃匿太祖大怒人皆股戰圍內惟有一鹿俄亦突圍而走敦躍馬馳之鹿上東山敦棄馬步逐至山半便擊之而下太祖大說諸將亦得免責

周書蘇綽傳綽除著作佐郎屬太祖與公卿往昆明池觀漁行至城西漢故倉地顧問左右莫有知者或曰蘇綽博物多通請問之太祖乃召綽具以狀對太祖大悅因問天地造化之始歷代興亡之迹綽既有口辯應對如流太祖益喜乃與綽並馬徐行至池竟

不設網罟而還遂留綽至夜問以治道太祖臥而聽之綽於是指陳帝王之道兼述申韓之要太祖乃起整衣危坐不覺膝之前席語遂達曙不厭詰朝謂周惠達曰蘇綽真奇士也吾方任之以政卽拜大行臺左丞參典機密自是寵遇日隆

高祖有疾還至雲陽命中山公護受遺輔嗣子冬十月乙亥崩於雲陽宮還長安發喪諡閔帝天成元年追尊爲文皇帝

明帝紀二年詔曰三十六國九十九姓自魏氏南徙

皆稱河南之民今周室旣都關中宜改稱京兆人通志靜帝大象元年咸陽池變爲丘

二年四月壬午幸中山祈雨至咸陽宮雨降

創業起居注初周齊戰爭之始周太祖數往同州侍從達官隨便各給田宅景皇帝與隋太祖並家於州治隋太祖宅在州城東南西臨大路景皇帝宅居州城西北而面灤水東西相望二里之間數十年中兩宅俱出受命之主相繼代興時人所見開闢已來未之有也

古今圖書集成
同州志隋文帝開皇元年同州得石龜文曰天子延
千年大吉三月移蓋屋連理樹植於宮庭

通志開皇二年京師承明里醴泉出二月京師雨土
潼關衛志開皇四年六月隋主以渭水多沙深淺不
常漕者苦之謂宇文凱鑿渠引渭自大興城東至潼
關三百里名廣通渠漕運通利關內賴之

通志開皇六年二月京師雨毛如馬駿尾長者三尺
餘短者六七寸八月關內旱

同州志隋開皇七年十月庚申幸同州以先帝所居

降囚徒又幸蒲州十一月自蒲還幸馮翊

涇陽縣志開皇十四年饑百姓就食於關東

蓋屋縣志仁壽二年春蓋屋人以白楊木爲屋梁生
三條長二尺京房易傳曰后妃專政木仆復立斷枯
復生獨孤后專恣之應

長安縣志長安朝堂異時鄉村也偶村人於一樹下
集議有異僧棖公者忽來逐之曰此天子坐處汝等
何得居此棖公者向遊此村言詞恍惚然皆有驗後
隋文帝卽位果遷都於此

古今圖書集成
通志煬帝大業十一年二月孔雀集朝堂群臣以爲
鸞

長安縣志隋大業中京兆獄卒失其名酷暴諸囚囚
不堪其苦而獄卒以爲戲樂後生一子頤下肩上有
若肉柳無頸數歲不能行而死

隋書元暉傳暉拜都官尚書兼領太僕奏請決杜陽
水灌三時原溉舄鹵之地數千頃民賴其利

鄠縣志隋唐間星隕於鄠縣人家園中化爲巨石後
移府城九耀街唐時舉人就試以鐵釘之以驗其中

否後復置藩署以十官官清者得入大者得入因號
定官石

通志唐高祖武德元年閏七月長安古城鹽渠水生
鹽色紅而味甘狀似方印

同州志武德二年祭四海及河於同州

長安縣志隋煬帝在藩舊宅武德中賜尚書左僕射
蕭瑀西爲少陵原南接終南北至滻水卽漢鴻固原
也宣帝許后葬於此俗號少陵原

雒南縣志唐太宗爲秦王時獵于梁原土人立廟祀

之

同州志貞觀四年駕幸鹽池經朝邑賜朝邑民今年田租

十二年二月如長春宮免朝邑今年租賦降囚罪獺於河濱而去

十三年三月壬寅雲陽石燃方丈晝則有光投草木則焚歷年乃止

通志高宗永徽元年六月新豐渭南大雨零口山水暴出漂廬舍

同州志顯慶三年賦雍同等十五州民錢以作蓬萊宮

總章元年沙苑獲白鴈初太子弘請以同州沙苑分假貧民會納妃有司奏費用白鴈適苑中獲之帝甚喜

十五年七月雒水溢壞同州城市及馮翊縣漂居民二千餘家

儀鳳三年五月丙寅高宗在九成宮霖雨大寒兵衛有凍死者

永隆元年長安獲女魃長尺二寸其狀怪異是歲秋不雨至於明年正月十月甲子京師地震

通志武后垂拱二年新豐有山湧出名曰慶山

四年六月庚寅大風毀延喜門及景風門

永昌中華州赤水南岸大山晝日忽風昏有聲隱隱如雷頃之漸移東數百畝壅赤水壓張村民三十餘家高二百餘丈水深三十丈坡上草木完然

長安縣志久視元年三月雨雪

武后時來俊臣家井水變赤如血井中常有吁嗟聲

通志中宗神龍元年四月壬子同官縣大雨雹殺鳥獸渭水中有蝦蟆大如鼎

唐書崔湜傳湜除太子詹事初湜建言山南可引丹水通漕至商州自商鑿山出石門抵北藍田可通輓道中宗以湜充使開大昌關役徒數萬死者十五禁舊道不得行而新道爲夏潦奔豚數摧壓不通至是論功加銀青光祿大夫

韋嗣立營構別業於驪山鳳凰原鸚鵡谷有重崖洞壑飛流瀑水中宗親往幸焉因封嗣立逍遙公名其

古今圖書集成
園後瑀子銳尚襄城公主詔別營主第主辭以姑婦
異居有乖禮則因固陳請乃取園地充主第又辭公
主棨戟不欲異門乃併施瑀之院門

通志睿宗文明初新豐有馬生駒二首

咸寧縣志睿宗時婆羅門獻樂以刀鋒置地舞人倒
行其上或以足舞或裸體就刃或挺刃臍中而覆旋
之曲終而亦無傷又伏伸其手旋身遠手百轉無已
又有舞輪伎今之舞車輪者透三峽伎今之透飛梯
者又有弄椀珠伎大面撥頭踏搖娘窟礮子等戲明

皇置教坊於禁中處之

通志明皇開元十一年二月敕同華精兵所出地資
輦轂今後更不得取兩州兵防

天寶十載八月丙辰武庫火燒兵器三十七萬

十三載十一月靖恭坊南柳樹甘露降是歲秋民大
饑

鄠縣志唐寧王天寶中嘗獵於鄠搜林麓見茂草中
一櫃扃鎖甚固發視之乃一少女問之言姓莫氏叔
伯莊居遇賊賊中二僧劫我至此王命載之後乘時

古今圖書集成
適獲一熊遂置櫃中局之如故而去越二日二僧以櫃舁之鄂逆旅舍中夜久膈膊有聲翌日日出主人怪僧不起撤戶視之一熊衝人而出二僧者骸骨露焉上知之大笑莫氏表入宮爲才人能爲秦聲當時號莫才人囀焉

朝邑縣志姜師度引洛堰河溉馮翊河西二縣又闕河以溉通靈陂將棄地二千餘頃爲上田置十餘屯帝幸長春宮嘉其功下詔褒美加金紫光祿大夫唐書韋堅傳堅字子全京兆萬年人姊爲惠宣太子

妃妹爲皇太子妃中表貴盛故仕最蚤繇祕書丞歷奉光長安令有幹名見宇文融楊慎矜父子以聚斂進乃運江淮租賦所在置吏督察以佐國稟歲終增鉅萬元宗咨其才擢爲陝郡太守水陸運使漢有運渠起闕門西抵長安引山東租賦汔隋常治之堅爲使乃占咸陽壅渭爲堰絕灞澆而東注永豐倉下復與渭合初澆水銜苑左有望春樓堅于下鑿爲潭以通漕二年而成帝爲升樓詔群臣臨觀堅豫取洛汴宋山東小斛舟三百首貯之潭篙工柁師皆大笠侈

古今圖書集成
袖芒屨爲吳楚服每舟署某郡以所產暴陳其上若
廣陵則錦銅器官端綾繡會稽則羅吳綾絳紗南海
瑇瑁象齒珠琲沉香豫章瓷飲器茗鎗釜宣城空青
石綠始安蕉葛蚶膽翠羽吳郡方文綾船皆尾相銜
進數十里不絕關中不識連檣挾櫓觀者駭異先是
人間唱得體紇那歌有揚州銅器語開元末得寶符
於桃林而陝尉崔成甫以堅大輪南方物與歌語叶
更變爲得寶歌自造曲十餘解召吏唱習至是衣缺
胯衫錦半臂絳冒額立艫前倡人數百皆巾幘鮮冶

齊聲應和鼓吹合作船次樓下堅跪取諸郡輕貨上
於帝以給貴戚近臣上百牙盤食府縣教坊音樂迭
進惠宣妃亦出寶物供具帝大悅擢堅左散騎常侍
官屬賞有差蠲役人一年賦舟工賜錢二百萬名潭
曰廣運堅進兼江淮南租庸轉運處置等使又兼御
史中丞封韋城縣男

劇談錄曲江池本秦世隍州開元中疏鑿遂爲勝境
其南有紫雲樓芙蓉苑其西有杏園慈恩寺花卉環
周烟水明媚都人遊翫盛於中和上巳之節綵幄翠

古今圖書集成
疇匝于堤岸鮮車健馬比肩擊轂上巳卽賜宴臣僚
京兆府大陳筵席長安萬年兩縣以雄盛相較錦繡
珍玩無所不施百辟會於山亭恩賜太常及教坊聲
樂池中備綵舟數隻唯宰相三使北省官與翰林學
士登焉每歲傾動皇州以爲盛觀入夏則菰蒲葱翠
柳陰四合碧波紅蕖湛然可愛好事者賞芳辰翫清
景聯騎攜觴亶亶不絕

通志肅宗至德二載昭陵石馬汗出

乾元三年七月渾天儀有液如汗下流

代宗廣德二年秋饑斗米千錢

永泰元年春京師饑斗米千錢三月辛亥大風拔木
四月畿內麥稔

大曆八年九月櫟陽民家牛生犢二首

唐書李栖筠傳栖筠進工部侍郎關中舊仰鄭白二
渠溉田而豪戚壅上游取磴利且百所奪農用十七
栖筠請皆徹毀歲得租二百萬民賴其入

通志德宗興元六年春大旱無麥苗井泉竭人暍且
疫死者甚衆

貞元元年春旱夏蝗西盡河隴群飛蔽天旬日不息
草木葉及畜毛皆盡餓殍枕道至於八月灞澹將竭
長安井皆無水

四年正月庚戌朔德宗御含元殿受朝賀及明殿階
及欄檻三十餘間自壞衛士死者十餘人大雨有物
墜地如猪八月灞水暴溢殺數百人

三原縣志四年令有司修葺陵寢於是遣諫議大夫
平章事崔植完修八陵使及所司計高祖獻陵太宗
昭陵高宗乾陵中宗定陵元宗泰陵五陵各造屋三

百七十八間睿宗橋陵一百四十間代宗元陵三十
間唯肅宗建陵不復創造但修葺而已

同州志九年四月地震壞城壁廬舍地裂水湧

貞元中文仙洞西南隅生竹兩幹特起子枝布立合
六十四數宛類著策人以爲異

商州志朱泚之亂國用不足侍御史万俟著開金商
運路諸道貢賦繼至用度始振

德宗時西幸李希烈阻兵江淮運道艱難租庸鹽鐵
使包佶命判官王紹督緣路輕貨趣金商兼程出洋

古今圖書集成
州赴行在德宗親勞之曰六軍未有春服我猶衣裘
紹俯伏流涕奏曰包佶令臣間道進奉數約五十萬
上曰道路回遠餉費懸急卿所奏豈可望耶不數日
所督繼至上深賴焉

咸寧縣志貞元中京畿大旱詔分兩市祈雨街東康
崑崙善琵琶謂街西無己敵登樓彈一曲新翻調街
西亦建一樓街東大誚之及崑崙度曲西樓亦彈此
曲移入楓香調中絕妙入神崑崙大驚請以爲師乃
莊嚴寺一尼段師也翌日德宗召見甚嘉獎先令崑

崙彈一曲段曰本領尚雜兼帶邪聲崑崙曰段師神
人也帝令授崑崙段奏曰請崑崙不近樂器十數年
忘其本領然後可教也詔許之後果窮段師之藝

崔護舉進士不第清明獨遊城南見一莊叩門求飲
有女子開門以盃水至護飲之女倚小桃柯獨立屬
意殊厚來歲清明護復往門已扃鎖護題云去年今
日此門中人面桃花相映紅人面不知何處去桃花
依舊笑東風後日復至門聞哭聲一老父曰子非崔
護耶吾女見桃花詩句絕食而卒崔亦感動大呼曰

古今圖書集成
某在此女遂復生

通志憲宗元和八年六月庚寅京師大風雨毀屋飄瓦人多壓死大水城南深丈餘入明德門猶漸車輻辛卯渭水漲絕渡丙申富平大風拔棗木千餘株十二年六月乙酉京師大雨水含元殿一柱傾市中水深三尺毀民居二千餘家

太和九年三月乙卯京師地震四月大風拔木萬株及墮含元殿四鴟尾拔殿庭樹三壞金吾仗舍毀城門樓觀內外三十餘所

開成二年京城有蟻聚長五六十步闊五尺至一丈厚五寸至一尺

強循傳循字季先鳳州人累仕雍州司士叅軍華原無泉人畜多暍死循教人渠水以浸田一方利之號強公渠詔書褒予甚厚

李石傳石奏咸陽令韓遼治興成渠渠當咸陽右十八里左直永豐倉秦漢故漕渠成起咸陽抵潼關三百里無車輓勞則轅下牛盡可耕永利秦中矣李固言曰然恐役非其時奈何帝曰以陰陽拘畏乎苟利

古今圖書集成
於人朕奚慮哉

通志宣宗大中四年以鄭光孝爲平盧節度使徙河中鳳翔又賜鄆雲陽二縣良田詔除其租

同州志成通七年詔免一歲稅

劇談錄九年春華陰縣南十餘里一夕風雷暴作有龍移湫自遠而至先是崖壟高亞無貯水之所此夕迴潭數丈小山從東西直互南北峯巒草樹一無所傷碧波迴塘湛若疏鑿京洛行旅無不枉道而觀有好事者自輦轂蒲津相率而至車馬不絕逮於累月

通志僖宗廣明元年華嶽廟明皇御製碑隱隱然有聲聞數里浹旬乃止

中和元年九月長安馬生人

昭宗光化四年冬帝在東內武德門烟霧四塞門外日色皎然

厚德錄李行簡爲八州軍體量安撫使時大饑乃發義倉賑饑者

有白將軍者常洗馬曲江馬忽跳出驚走前足有物色白如帶縈數匝遽令解之血流數升白異之封紙

古今圖書集成
帖中藏衣箱一日送客澹淡出示客客曰盍以水試之白以鞭築地成竅置蟲於中沃盥其上少頃蟲蠕蠕而長竅中泉湧倏忽自盤若一席有黑氣如烟衆懼曰必龍也遂急歸未數里風雨驟至大震數聲竇貞固傳貞固同州白水人隱帝卽位加司徒改本貫永安鄉爲賢相鄉班瑞里爲勳貴里
雜南縣志宋太宗太平興國三年四月秦嶺石洞自開遣吏馮文則秉燭觀之入數丈得丹砂千二百粒獸形石六以獻

通志七年京兆咸陽縣渭水漲壞浮梁溺死者五十四人

宋史五行志天禧五年九月丙寅華州少華山前阜頭峯越八盤嶺及谷摧陷於石子坡東西五里南北十里潰散墳裂湧起堆阜各高數丈長若隄岸至陷居民六社凡數百戶林木廬舍亦無存者近山之民言數年以來峯上常有雲每遇風雨卽隱隱有聲是夜初昏略無風雨山上忽霧起有聲漸大地遂震動不及食頃而山摧

劉几傳几從范仲淹辟通判邠州邠地鹵民病遠汲几浚渠引水注城中客曰自郭汾陽城此州苟外水可醜何待今日無爲虛費勞人也几不答未幾水果至鑿五池於通遠民大便利

通志宋仁宗慶曆三年大饑民東徙詔遣韓琦宣撫陝西發倉以賑

雒南縣志慶曆間知商州皮仲容議採洛南紅崖銅置阜民監虢州青水洞銅置朱陽監鑄大錢一可當三後竟以難行廢

皇祐中商洛額貢金三十九兩課數虧熙寧四年詔罷之

宋史呂大防傳大防爲永壽令縣無井遠汲於澗大防行近境得二泉欲導而入縣地勢高下衆疑無成理大防用考工水地置泉之法以準之不旬日果疏爲渠民賴之號曰呂公泉

范雍傳雍知永興軍初完永興城或言其非便詔止其役雍匿詔而趣成之明年賊犯定川邠岐之間皆恐而永興獨不憂寇

老學庵筆記宋熙寧間癸丑華山阜頭峯崩峯下一
嶺一谷居民甚衆皆宴然不聞乃越四十里外平川
土石雜如簸揚七社民家壓死者幾萬人壞田七八
千頃固可異矣

曾子宣丞相元豐間帥慶州未至召還至陝府復還
慶州往來潼關夫人魏氏作詩戲丞相曰使君自爲
君恩厚獨不區區愛華山

同州志宋元祐二年七月置韓城錢監

聞見錄太祖微時遊渭州潘原縣過涇州長武鎮寺

僧守嚴者異其骨相陰使畫工圖於寺壁青巾褐裘
天人之相也今易以冠服矣

中隱王正叔云王仲至帥長安日境中壞一古冢有
碧色大瓷器容水一斛中有白玉嬰兒高尺餘水故
不耗敗如新汲者玉嬰兒爲仲至取去

張浮休云盜夜發咸陽原上古冢有火光出用劍擊
之鏗然以墜視之白玉簾也豈至寶久埋藏欲飛去
邪旣擊碎之有中官取以作筭籌浮休亦得一二
老學庵筆記先君入蜀時至華之鄭縣過西溪唐昭

宗避兵嘗幸之其地在官道旁七八十步澄深可愛亭曰西溪蓋杜工部詩所謂鄭縣亭子澗之濱者亭旁古柏間支徑入小寺外弗見也有柘木版揭梁間甚大書杜詩筆亦雄勁體雜顏柳不知出何人書墨挺然出版上甚異或云墨著柘木皆如此

同州志政和間詔建唐憲宗廟於同州配食以岐公杜佑晉公裴度李贊皇吉甫涼公李愬

雒南縣志宋高宗紹興十二年八月皇太后韋氏至自金鄭剛中以商秦之半畀金人商之半卽洛地也

金史傅慎微傳慎微爲陝西經略使尋權同州節度使事明年陝西大旱饑死者十七八以慎微爲京兆鄜延環慶三路經濟使許以便宜慎微募民入粟得二十餘萬石立養濟院飼餓者全活甚衆改同知京兆尹權陝西諸路轉運使復修三白龍首等渠以溉田募民屯種貸牛及種子以濟之民賴其利食貨志貞祐四年耀州僧廣惠言軍儲不足凡京府節鎮以上僧道官令納粟百石防刺郡副綱威儀等七十石者乃充三十月滿替諸監司十石周歲代願

古今圖書集成
復買者聽詔從之

通志金元光元年正月詔徙中京唐鄧商號許陝等州屯軍及家屬赴京兆同華就糧

同官縣志元至元八年蜀人常德明事叔母廖氏甚善後避兵北徙至中部廖疾甚醫謂必得附子可愈德明走秦川購之市苦無附狼狽歸過同官靈泉觀取米而炊米囊舊有一胡桃取置其側炊畢掇之怪實且沉以火燭之乃一大附子也且喜且愕持歸奉叔母果愈萬戶劉秉中爲記立石

長安縣志元泰定帝泰定元年六月陝西大雨渭水及黑水河溢損民廬舍

文宗天曆二年陝西行省言終南屯田大水損禾稼四十餘頃詔蠲其租

耀州志順帝至正十一年十一月冬至夜耀州星殞西原光耀燭地聲如雷鳴者三化爲石形如斧一面如鐵一面如錫削之有屑擊之有聲

十九年蝗食禾稼草木俱盡所至蔽日礙人馬不能行填坑塹皆盈饑民捕蝗以爲食或曝乾而積之又

罄則人相食

朶兒直班傳元季商州由興元鳳翔奉元道里迥遠
乃開義谷創置七驛路

鄠縣志秦渡仙柳在四真觀宋冲陽王真人演教之
所馬譚丘劉自山東來受業於冲陽分誌插柳各自
爲蹤遂名四師堂春夏之交仙柳爭榮綠陰茂密更
宋元柳枯入明洪武初勅賜應夢真人孫碧雲遊覽
終南太華經歷於此仙柳枯而復榮乃復立觀亦一
異也

雒南縣志明初于頁山之麓開採石青鑿徹洛河之
水汹涌上溢數百人盡溺死其中每夜哭聲不絕後
建雷神廟鎮之今上絕懸嶂內阻重淵渺不可復問
矣

通志明成化六年華陰縣治廨中生穀一本五穗者
數莖

乾州志成化年州民見地上光生數夜掘開得石匣
內玻璃瓶貯舍利子僧正悟曉進于朝今藏興國寺
中

古今圖書集成
朝邑縣志十四年正月元日關中地震朝邑爲甚壞
城郭官民廬舍高原井竭卑濕地裂奄忽水深尺許
蒸庶驚惶四出壓死四百餘人至十一月猶震不已
敬皇遣都給事中蕭斌祭

通志正德七年太平橋有女子化爲男子長鬚後生
二子三月渭南縣地震

郃陽縣志十年秋有虎自梁山來踰城入按察司升
大槐樹巔咆哮甚厲知縣張綸召壯民搏殺之

十六年五月本府牛生犢遍身有甲類麟人以爲異

遂鞭殺之

商州志十六年雨毛草似馬鬃

華州志正德末年華州唐村牛生麟胎卒

藍田縣志嘉靖七年大禳八月忽有天火一塊大如
甕後隨如斗如升如拳者不絕垂地而散此時日色
如火地氣如蒸人若居火中至十六日大火延燒房
屋五千餘間坊表數十座

同州志七年旱自五月至九月不雨民大徙

同官縣志十二年回賊千群嘯聚文王山劫掠紙房

古今圖書集成
陳爐諸村居民大震動大軍討平之

通志十三年五月邠州涇陽縣大水淹沒涇渭兩岸居民畜產無數六月同州地震若雷數日方止連震十五次

十八年三月西安地動二次房屋搖動同州龍出於樹大風雨鳥鵲死者無數

二十五年華陰黃河清

澄城縣志嘉靖二十六年七月麻林陂山移東西分馳三四里遺址平陷都御史謝蘭奏聞

同官縣志二十六年北敵萬騎從長鎗而下同官戒嚴頃以崎嶇不便長驅遁去

通志嘉靖三十二年大旱民移褒城甘露降啓聖祠柏樹滴如凝脂食之如蜜

藍田縣志三十四年又大禋秦嶺山一帶竹開花結子人取以充饑其年十二月十三日地震如雷衙門房廡倒塌街市房屋店舍俱平壓死男婦無數至次年正月中始止

朝邑縣志嘉靖乙卯十二月十二日子夜地大震聲

如轟雷勢如簸蕩一時廬落盡圯死者數萬卑溼之處地裂泉出高丈餘井竭洛渭可涉泉出有魚有炭有積薪水溫可浴一晝夜動二十餘次大樹忽仆忽起人人自危面無生氣方是時強者倡資抄略幾大變兵道徐貢元馳至省城會方略以誅殺定之天子出大使祭告賑卹大使作色顧謂朝邑無害抵臨潼大使死己未震猶不止

永壽縣志三十八年三月兩日相盪夏麥雙岐

三十九年城西武亭河崖穴中出白霧俄然結成人

馬形有乘馬者有步行者宛然如生皆雄傑可畏至盤道山北散為有翼螻蟻

華州志四十五年華州西關猪生象胎卒

華陰縣志四十五年河吼橫出石脊舟楫不通月餘始沒

澄城縣志大賢里鄭某嘉靖間於親鄰寨中掘得一陶枕制頗工緻中央有刻云天聽寂無音蒼蒼何處尋非高亦非遠都只在人心兩旁對刻云賣酒樓頭風颭颭織綾梭畔雨瀟瀟不知何謂

古今圖書集成
嘉靖初縣治前一民家婦月辰就褥產一物其狀如人頭口耳俱無惟有十數目叢頂上張眼不時殆人妖乎

藍田縣志隆慶元年十二月地震房屋樹多倒

四年六月初九日雨雹如斗大河溢地陷

五年五月二十六日午時龍見渠仙坊燒毀鄉民劉掩家其龍身體爪尾極真傾邑人環視皆見

萬曆四年三月妖人李一真王伯溫謀不軌人心驚慌者靡月

永壽縣志七年八月初三日流賊破城掠甚慘十月地震

八年八月初二日賊又破城房屋焚燬殆盡

咸寧縣志十年新鐘樓閣成有司移鐘於上越十日城市無故自驚每薄暮喧呼趕妖至五鼓乃已如此月餘僉謂鐘神不安仍移故處

藍田縣志十年有白狼遊野遇人輒噬

咸寧縣志十四年二月三日夜陰晦大風中若電光雨火如飛星墮地即滅是年關中無秋民大饑村氓

爭取石子充麵食之相傳石門谷中饑者啼於道瀕
死有老嫗指示此石忽不見一時喧然異之

同官縣志十四年二月十二日夜異風自北發壞屋
拔木空中閃爍有光城垣兵仗上皆見火移時方止
冬月地夜震有聲是年大旱饑

盩厔縣志十五年夏疫大旱秋霖雨霜殺菽歲大饑
死者甚衆

永壽縣志十五年大旱人相食是年地震回賊剽掠
至城下劫殺甚衆

同州志十六年春夏復大疫人多死且徙者

盩厔縣志二十二年三月初九日龍起于運渠店北
里許穴僅容蟻上漸闊數日視之尚有光如電又白
馬河東掘地蛻骨盈車角爪俱全

同州志二十三年正月州西孫家塞池冰有文如畫
花莖柯葉皆具

永壽縣志二十三年五月雨雹烽火臺一雹大如牛
形四五日始消

通志三十二年夏四月大風雨毀東華門樹木皆折

古今圖書集成
九月十一日夜半天忽東西斷裂南北若正練食頃
復合如故

咸寧縣志三十二年關川里產雙麟將北獻途經城
南死西安知府張舜命瘞慈恩寺前碑曰雙麟塚
蓋屋縣志三十六年歲大饑人相食民謠曰狗吠向
乞兒乞兒好語之終是汝口肉只爭早與遲
白水縣志萬曆三十七年雹不爲災初雹入縣北境
忽旋風自秦嶽廟出聲如破釜色間紫赤大蓋數十
畝直衝雲散是年麥大穫

永壽縣志四十二年天鼓鳴彷彿砲聲墜地閃爍如
電

藍田縣志四十三年蟋蟀食禾殆盡

商州志四十三年春土門川地方李清溝有黑龍橫
溝而伏圍徑丈餘鱗大如盃首尾埋兩山中訛傳肉
能止痘土人爭取以飼小兒旋割旋生盛暑懸屋中
不生蟲不變臭州守王邦俊聞之親祭命僧道於其
處誦經三日嚴禁割者乃止七月夜二更忽大雷雨
洪水泛漲沒民田甚多遂不見

古今圖書集成
蒲城縣志萬曆四十三年乙卯十月十七日房舍草木上皆如霜雪屋內蛛網遊絲皆然早行人鬚眉巾帕皓白堅凝不可去其臭如鐵腥如是者十有五日通志四十四年夏六月藍田蝗飛蔽天合省大旱二十一日大雨如注五六日涇陽縣口子鎮人見有羊相鬪忽化爲龍橫截峪水須臾而下推激大石如萬雷聲兩旁山爲之動直抵雲陽至三原越龍橋而過淹沒百里漂七十餘村白渠以北鮮有存者數月平地水方盡

四十五年富平冰雹澄城冬月桃李皆華
乾州志四十六年雷震異常儒學戟門前槐樹出龍
藍田縣志天啓元年龍曲灣大雨地移爲凹四五里
之外房屋皆陷

渭南縣志天啓元年五月朔大風拔木迅雷擊樹南
原一帶冰雹如卵麥果多傷叢桂西王二里地裂數
處有闊二三尺長五六丈者初有氣人不敢下視投
之塊杳不聞聲經日始合七月大雨彌月渭北一帶
河水泛溢從子夜橫來倉皇突塞而衝壁倒屋頃刻

古今圖書集成
立盡扶老攜幼莫知所之號哭之痛漂沒之慘難言矣

蒲城縣志二年辛酉秋有鶴十八隻棲學後北寺浮圖經兩晝夜飛去

醴泉縣志癸亥索村董氏柱下忽開蓮花一朶後半日落

雒南縣志三年蝗食禾邑令陳驅於縣東薄穀嶺因改其地曰播穀嶺

醴泉縣志甲子七月烈風雷雨陶堡村地陷闊二丈

深數尺長數里

蒲城縣志四年癸亥秋霖雨邑西鄉南阜魏氏家院中落一火塊如竈底炭煤結成圍三尺用鎗撥碎如水銀不能開試以手不熱拾之瓢宛然煤渣次早視之止芥數莖絕無痕如是者五日每未後火發夜半止九月二十日子時地震屋瓦有聲合境喊起幸未傷人

七年丙寅五月邑西南大灘中產物如爛綿花久爲泥所汚狀計厚寸許每晨揭去一層次蚤復然近灘

古今圖書集成
居民多取以造楮或裝衣或苫蓋麥豆爲避雨資廣
衍數里約兩月止

丁卯老軍營方士名家猪產象

通志崇禎元年三月初四日黃霧四塞七月二十四
日藍田絳村天雨如豌豆應手成粉

四年冬大雪兩月深丈餘冬至夜五鼓天震聲如砲
火光迸裂須臾落地如弓曲狀移時沒有熊入西安
府城不傷人號熊居士人爭飼之

蒲城縣志五年壬申春夏狼成群噬人所傷甚多是

年溫湯池水溢

甲戌二月雨灰狀若竹葉如是數日各邑皆然

維陽縣志十年十一年蝗蝻浹歲食禾苗及穗並及
粒農者脫衣隴頭驅之瞬息間嚙衣殆盡洛河南有
以衾單曬麥者食麥並嚙其單如網目

武功縣志己卯十月內昭仁寺東岳廟前至日晡卽
從空墜石邑人往觀填街塞巷有破頭傷面者或執
鎗棍細搜却無人影但南搜廟則石從南來北搜寺
則石從北來城破始罷

古今圖書集成
十三年舊逸商驛久封四外去民居甚遠忽大火起
房舍悉焚

蓋屋縣志十三年遺蝗蝻生食夏秋苗盡是歲冬粟
二斗白金一兩

十四年春大饑米二升白金一兩人民相食死者枕
藉是年夏有年有絕其家而無人收者

渭南縣志崇禎十三四年歲大稔麥米每斗價二兩
四五錢各鄉鎮無糧市人民餒斃十之七八邑西關
有人市年少婦人價不及千錢有飯一食易一妻米

一升易一婢者

武功縣志白厓湖自宋天禧五年阜頭峯崩其下水
出渟泓數百頃時以爲海眼禱雨輒應疑爲蛟龍所
窟至崇禎十四年大旱湖竭自岸至底僅二丈餘止
有鯉魚大不過十斤無復異物人盡捕之湖底悉黃
壤民各分畦耕種會湖水忽盈復瀟淼如昔此一異
也

十五年彭公堡夜巡見鎗尖火光數寸其色黃撲之
不見其後各堡亦間有之

古今圖書集成
長安縣志胡汝礪郎中時友人馬令聰出對云周制
上士倍中士胡屬云孟子前喪踰後喪胡復出云孝
哉閔子騫馬屬云死矣盆成括時值吉宴座客咸懽
賞以爲確對不一月馬卒於三河館舍胡丁外艱歸
乃知前對各自爲識也

妖人張琴住降得坊以左道惑衆萬曆十八年大旱
兩司洎府縣延羽士禱雨於武安廟琴以小法試其
術爲道士覺白咸寧尹李生芳擒之按驗於家得紙
人馬俱戎裝二豎櫃螻蟻數罍人血數瓶斃於獄

涇陽縣志明末流寇蜂擁州縣俱受其荼毒邑人僉
事道王徵特創築崇墉保障一方先是開渠堰大資
灌溉民甚德之後聞京城失守遂不食七日死門人
私謚曰端節子庠生永春當闖賊陷西安僞檄徵徵
徵守正不屈永春代繫賊所後得脫歸遂絕意仕進
高尚終身里人稱忠孝之門焉

古今圖書集成
方輿彙編職方典
第五百二十二卷目錄之一

欽定古今圖書集成方輿彙編職方典

第五百二十二卷目錄

西安府部雜錄

西安府部外編

職方典第五百二十二卷

西安府部雜錄

漢舊儀長安城中經緯各長三十二里十八步地九百七十二頃八街九陌三宮九府三廟十二門九市十六橋地皆黑壤今赤如火堅如石

三輔黃圖長安城東出南頭第一門曰霸城門民見門色青名曰青城門或曰青門

長安城東出第二門曰清明門一曰籍田門以門內有籍田倉一曰凱門

古今圖書集成
長安城東出北頭第一門曰宣平門民間所謂東都門

長安城南出東頭第一門曰覆盎門一號杜門

長安城南出第二門曰安門亦曰鼎路門北對武庫
長安城南出第三門曰西安門北對未央宮一曰便門卽平門也古者平便皆同字

三輔決錄長安城西門曰便橋橋北與門對因號便橋

長安城北第二門曰廚城門長安廚在門內因爲門

名

漢城門皆有候門候主候時謹啓閉也

長安城面三門四面十二門皆通達九達以相經緯
衢路平正可並列車軌十二門三塗洞闢隱以金椎
周以林木左右出入爲往來之徑行者升降有上下
之別長安市有九各方二百六十六步六市在道西
三市在道東凡四里爲一市致九州之人在突門夾
橫橋大道市樓皆重屋長安八街九陌有香室街夕
陰街尚冠前街

長安城中閭里一百六十室居櫛比門巷修直有宣
明建陽昌陰尚冠修城黃棘北煥南平等里

漢武帝紀天下名山八而三在蠻彝五在中國中國
華山首山太室太山東萊此五山黃帝之所常遊與
神會

道經西嶽姓浩名元倉

龍魚河圖華山姓浩名鬱狩

地理志太一山古文以為終南華山古文以為敦物
皆在扶風武功縣東

三秦記隴西關其阪九迴不知高幾許欲上者七日
乃越高處可容百餘家下處數十萬戶其上有清水
四注俗歌曰隴頭流水鳴聲幽咽遙望秦川心肝斷
絕去長安千里望秦川如帶關中人上隴者還望故
鄉悲思而歌則有絕死者

河西有沙角山峯崿危峻逾於石山其沙粒麤色者
有如乾糲又山之陽有一泉云是沙井綿歷今古沙
不填足人欲登峯必步下入穴即有鼓角之音震動
人足

古今圖書集成
關中記漢築長安城及營宮殿咸以堙平至今坊市
北據高原南望爽塏視終南如指掌

涇與渭洛爲關中三川與渭灞滻澇潏豐澆爲關中
八水

西京雜記未央宮周迴二十二里九十五步五尺街
道周迴七十里臺殿四十三其三十二在外其十一
在後宮池十三山六池一山一亦在後宮門闈凡九
十五

太液池邊皆是彫胡紫葳綠節之類菰之有米者長
安人謂爲彫胡葭蘆之未解葉者謂之紫葳菰之有
首者謂之綠節

終南山多離合草葉似江蘼而紅綠相雜皆紫色氣
如蘿勒有樹直上百尺無枝上結藂條如車蓋葉一
青一赤望之斑駁如錦繡長安謂之丹青樹亦云華
蓋樹亦生熊耳山

漢諸陵寢皆以竹爲簾簾皆爲水紋及龍鳳之像昭
陽殿織珠爲簾風至則鳴如珩珮之聲

何武葬北邙山薄龍坂王嘉冢東北一里

太液池中有鳴鶴舟容與舟清曠舟採菱舟越女舟
太液池西有一池名孤樹池池中有洲洲上結樹一
株六十餘圍望之重重如蓋故取爲名

水經注華山爲西嶽在弘農華陰縣西南古文之惇
物山也

南部新書野狐泉店在潼關之西泉在道南店後坡
下舊傳云野狐培而泉涌店人改爲冷淘過者行旅
止焉今法饌中有野狐泉者以菜粉爲之亦象此也
聞見錄予過武功唐高祖宅昔號慶善宮今爲佛祠

前向渭水史載太宗生之日有二龍戲於門外此地
也形勢殊偏仄蘇世長云昔侍陛下於武功見所居
宅僅避風雨者有唐二帝紵漆像不知何帝也游景
叔得唐本太宗畫於屋壁極奇偉與世所傳不同也
鄰幾雜誌趙龍圖師民自耀過同說設禰城有設禰
廟疑設禰亦是一兵械其秦禱兵之所乎

老學庵筆記秦所作鄭白二渠在今京兆府之涇陽
皆以涇水爲源白渠灌涇陽高陵櫟陽及耀州雲陽
三原富平凡六縣斗門百七十餘所今尚存然多廢

古今圖書集成
不治鄭渠所灌尤廣袤數倍於白渠涇水乃絕深不能復入渠口渠岸又多摧圯填淤比之白渠尤不可措手矣

東蒙蓋終南山峯名杜詩云故人昔隱東蒙峰已佩含景蒼精龍故人今居子午谷獨在陰崖結茅屋皆長安也种明逸東蒙新居詩亦云登遍終南峯東蒙最孤秀南士不知故註杜詩者妄引顓臾爲東蒙主以爲魯地

劔門關皆石無寸土潼關皆土無拳石雖皆號天下險固要之潼關不若劔門然自秦以來劔門亦屢破矣險之不可恃如此

芥隱筆記三輔黃圖長安故城城南爲南斗形城北爲北斗形故號斗城何遜咸陽詩云城北疑連漢老杜秦城近斗杓秦城北斗邊北斗故臨秦而秦中詩春城依北斗郢樹發南枝乃秦城耳劉夢得望賦亦云城依斗兮闌干春亦無義亦不可對郢樹也

癸辛雜識咸陽有六岡如乾之六爻故曰咸陽唐時宮殿皆在九岡上而作太清宮於九五岡上百官府

古今圖書集成
皆在九四岡上

春明夢餘錄駱谷自蟄屋東南三十里有道入洋縣北三十里爲灋谷南口曰灋北口曰駱實一谷也中距八十四盤唐德僖幸興元由此

偃曝談餘臨潼縣驪山溫泉上有室三楹扇鎖甚嚴蓋非貴人不得浴此其四周甃石如玉環狀中一小石上鑿七竅泉由是出室之內有古今石刻近知縣事者聚之壘於門外儼若屏障溫泉之左有泉曰混池以浴小民東行卽華清宮故址上有三清殿前臥

一巨鐘視其款乃華清物玉女閣方池卽溫泉發源處飲之可以已疾每秋暮人取未熟柿投其中經宿食之不澀

唐興慶宮廢宮故址隆然而高四周皆古柏壽藤其右稍上爲沉香亭又上爲貴妃洗粧樓與興慶柱礎俱存

唐高宗陵石表二飛龍馬二方石上刻爲畢方之形者二石馬十石人二十石碑二其左無後人爲刻名於上入門乃陶甃所甃其半已傾右石人爲回紇狀

古今圖書集成
者六十有四其上卽高宗陵武氏與之合葬
通志長樂未央甘泉遺址皆有形製古妙精緻雖塵
壤漬蝕破之如新人有得其瓦頭者皆古篆盤曲隱
起以爲華藻其文有長樂未央等字以是知古人製
作不苟雖瓦甃必銘識不特彝鼎然
鄠縣志鈞臺之南有羅什寺寺之後有樹二株命曰
淨土乃西域鳩摩羅什憩此壘土所生者三月花八
月實中皆黃土異哉

高冠潭有河水衝流而下迅駛駭人潭水湧沸聞內
有神龍天旱禱雨投猪狗血於中龍必奮起成雹卒
不可避宋蔡京嘗奉詔祠此有碑

雒南縣志今洛以北自王家莊訖新莊以東長渠一
道幾二十里鄉人傳爲隋煬帝行舟故道吾不甚省
洎讀今獻彙言虹縣靈壁直河千里無水是煬帝積
黍行舟處乃知鄉人之云有自來矣

縣南三十里有南芮鄉北芮鄉皆故芮伯國
契封於商爲商人始洛南在商封內鄭元云商在太
華南是也

古今圖書集成
舜子義均封於商號曰商均今商均有舜九子墓者
義均與弟季釐等九人也與契同封於商號十商今
十商分地不可考然洛商壤故及之

西安府部外編

咸寧縣志杜伯名曰恆爲周大夫宣王妾女鳩欲通
之伯不可女鳩訴之王曰恆與妾竊交王怒囚伯於
焦使薛甫司空錡殺杜伯其友左儒九諫而王不聽
伯旣死爲人見王曰恆之罪何王名祝以伯語告祝
曰殺杜伯誰與王謀曰司空錡也祝曰何不殺錡以
謝之王乃殺錡伯復至言其無罪錡亦爲人而至言
臣何罪王告皇甫曰祝也我謀而殺之殺者又爲人
而見訴柰何皇甫曰殺祝以謝可也王又殺祝以兼

古今圖書集成
謝焉又無益皆爲人而至祝亦曰臣焉知之奈何以
此爲罪而殺臣也後三年宣王遊圃田騎從甚衆日
中見杜伯乘白馬素車司空錡左驂祝右驂朱冠盛
服起於道左執朱弓彤矢射王中心折脊伏弓衣而
死

通志周幽王二年日暈黑貫日中牛化爲虎羊化爲
狼三川竭

鄠縣志秦文公時雍南山有大梓公伐之輒大風雨
一人往山中聞鬼語樹神曰秦使人披髮以朱絲繞

樹伐汝得不困乎公聞言伐樹斷中有一青牛出走
入豐水中其後牛出豐水使騎擊之不勝騎墮地復
上髮解牛畏之入不出故置髦頭

涇陽縣志漢武帝元封元年祀甘泉至涇橋有女子
浴於涇水乳長七尺上怪遣問之女曰帝後第七車
知臣時侍中倪寬在第七車對曰此天狗星也主祭
祀齋戒不潔則女人星見

通志武帝與近臣宴未央殿方噉黍臠忽聞空中人
語曰老臣冒死自訴尋覓良久忽梁上有一老人長

古今圖書集成
八九寸面目頰皺鬚髮皓白自梁而下拄杖僂步而前帝問之稽首不言但仰頭視殿俯指帝足忽然不見問東方朔朔曰此名藻簾乃水木之精夏巢幽林冬潛深河今陛下頻造宮室斬伐其居故來訴耳仰頭視屋而復俯視陛下足者願陛下宮室止於此也帝感之爲之息役旣而幸瓠子河則前梁上翁及年少數人凌波而出皆長八九寸至帝前奏樂進觴獻帝一紫螺殼有物狀似牛脂又獻一珠徑數寸明耀絕世帝問東方朔殼中何物朔曰是蛟龍髓也

宣帝黃龍二年未央殿輅輪中雌雞化爲雄毛衣變化不鳴不距

長安縣志成帝河平元年男子石良劉音相與同居有如人狀在其室中擊之爲狗走去後數人被甲持兵弩至良家良等擊之死傷皆狗也自二月至六月乃止

雒南縣志晉劉曜時上洛男子張盧者死二十七日有盜發其塚得甓

同州志苻秦皇始四年大霖雨河渭皆溢蒲津得一

古今圖書集成
履長七尺三寸人跡稱之指長尺餘文深一寸先是
新平民張靖見長人與語俄而不見新平令以聞苻
健以爲妖下靖獄至是蒲津監寇登以履上健嘆曰
覆載中何所不有張靖所見不虛也赦之

渭南縣志隋文帝開皇末渭南有沙門三人行頭陀
法於人場圃中夜見大豕詣其所小豕從者十餘謂
沙門曰阿練我欲得賢聖道然猶負他一命言罷而
去又有人寄宿他舍夜聞二豕對語

咸寧縣志唐太宗貞觀中終南山悟真寺僧夜入藍

溪聞有誦法華經者其聲纖遠時星月迴臨四顧聞
寂僧慘然有懼歸白於衆僧具往聽之經聲自地中
發標表其所明晨窮表下得骷顱一具其骨槁獨唇
吻與舌鮮而且潤持歸納以石函置于佛殿西軒自
是函中每夕有誦法華經聲長安觀聽者甚衆後新
羅僧來寺住歲餘伺寺僧悉出竊石函去跡其往已
歸海東矣

廣異記開元初有三衛自京還青州至華嶽廟前見
一婦人容顏慘悴曰己非人華嶽第三新婦夫壻極

古今圖書集成
惡家在北海三年無書信聞君還欲以尺書仰累海池上第二樹但叩之當有應者言訖訣去及至北海如言送書讀之大怒乃傳教西伐華山命左右取絹二疋贈使者三衛後至華陰復遇前婦人拜謝曰三郎怒君達書將兵於潼關相害可且還京不久大駕東幸鬼神懼鼓車君若坐於鼓車則無慮矣後數十日元宗幸洛三衛隨鼓車出關

咸寧縣志天寶初嚴安之爲萬年縣捕賊官亭午有中使黃衣乘馬自門馳入宣勅曰城南十里某公主

墓見被賊劫宣使往捕之不得漏失安之卽領所部并器械往掩捕見六七人方穴地道纔及埏門一時擒獲安之令求中使不得因思之曰賊方開塚天子何以知之至縣乃盡召賊訊其事賊曰纔開墓卽覺有異自知必敗至第一門有冥器勅使數人黃衣勅使騎馬內一人揚鞭狀如走勢幘頭角亦如風吹直豎眉目以來悉皆飛動某卽知必敗也安之卽思前勅使狀只乃冥器勅使耳

長安縣志天寶四年西域僧請於昆明池結壇祈雨

古今圖書集成
七日水縮數尺有老人夜詣僧宣律求救曰弟子昆明池龍也僧欺天求雨利吾腦命在旦夕律曰可求孫先生去老人求孫孫思邈曰我聞昆明池有仙方若傳吾救汝俄頃奉方而至孫曰汝還無慮僧及期池水泓溢如故僧羞恚而去

咸寧縣志鍾馗唐武德中應舉不第觸階死後明皇晝寢夢一小鬼盜玉笛上叱之忽有大鬼破帽藍袍角帶提小鬼剗其目擘而啖之上問對曰臣終南進士鍾馗不第而死蒙旨賜袍帶葬之誓除天下虛耗

帝感寤命吳道子圖其像儼然如夢中所見

羅思遠善隱形明皇樂其法嘗就思遠勤求之思遠雖傳不盡其要帝每與思遠同爲之隱没人不能見若自試或露衣帶巾角宮人每知所在帝多方賜賚或懼以死終不盡傳帝怒命力士裹以油襍置於油榨殺而瘞之不旬日有中官自蜀道回逢思遠於途乘驢而笑謂中官曰上爲之戲一何虐也

安祿山多置道術人謂術士曰我對天子無恐懼唯見李相則神機悚戰術士曰公有陰兵五百皆銅頭

古今圖書集成
鐵額常在左右何畏李相且曰吾安得見之祿山一日請宴宰相令術士於簾下窺之驚曰吾初見相公來有雙鬟二青衣捧香鑪先入僕射侍衛銅頭鐵額輩皆穿屋踰垣而走某亦不解其故

祿山亂梨園弟子笛師竄終南倚古蘭若寓焉每清宵朗月哀怨多思拔笛而吹聲嘹唳徹山谷俄間有物虎頭人形著白布單衣自外入曰美哉笛乎可復吹師大懼撩奏五六曲終虎頭人忽寐哈噫大鼾師懼覺乃抽身出避高樹枝葉密處及覺不見笛師懊

嘆曰不早食被其逸也立而長嘯有虎十餘至狀如朝謁語曰適有吹笛小兒乘我寐竄去可分路四遠取之散去少頃復曰遍覓無獲所時月落斜照樹間虎頭仰視笑曰謂爾雲行電滅乃在茲耶率諸虎攫取不可及復自跳躍亦不至遂散去須臾人行笛師得返

唐霸渭間閭村元某婦謝氏生女嫁來阿照謝亡三載托夢其女曰我生時酤酒作小升取價太多今罪遣北山下爲牛近賣法界寺夏侯師城南耕稽田平

古今圖書集成
苦幾斃女安知之女覺而語其夫乃問尼尼云固然
女訪之尼使人導耕田處就之其牛唯一人禁制他
偶近必觸見女至乃舐其遍體且流淚焉女詣尼贖
之隨之歸

陸康成嘗任京兆府法曹掾不避強禦忽見已故吏
抱案數百紙請押云此幽府文簿皆來年兵刃死者
康成亦在其數因大駭請爲脫厄曰惟金剛經可度
乃遂讀金剛經日數十遍明年朱泚反署爲御史康
成叱泚曰賊臣敢干國士泚震怒命數百騎環射之

康成默念金剛經矢不能傷泚曰儒以忠信爲甲冑
信矣乃舍去康成遂隱終南山不復仕

雒南縣志元和二年紅冶役夫將化爲虎衆以水沃
之不果化

酉陽雜俎宣平坊一官人夜歸賣油者張蓋驅驢馭
桶不避導者搏之頭隨而落遽入大宅官人異之隨
入至大槐下遂滅因告其家卽掘之深數尺樹根枯
朽有大蝦蟇如壘挾二筆錯樹津溜滿其中及巨白
菌如殿門浮漚釘其蓋已落蝦蟇卽驢筆錯爲油桶

古今圖書集成
菌卽其人也里人沽其油月餘異其油好而賤及怪
露食者悉病嘔洩

元和中光宅坊民家有病者將困家人環守之夕間
見一人入衆遂驚逐急走投甕中家人以湯沃之得
一袋鬼間所謂搐氣袋也忽聽空中有聲求其袋甚
切且言將別取人以代病者家人擲還之病者卽愈
咸寧縣志開成末永興坊王乙掘井過常度丈餘無
水忽聽下有人語及雞聲甚喧鬧近如隔壁匠懼不
可掘衢司申金吾韋處仁韋以事涉怪異不復奏遽

令塞之

陳季卿者江南人舉進士至長安十年不歸一日於
青龍寺訪僧不值憩於閣有終南山翁亦候僧偶坐
久之壁間有寰瀛圖季卿尋江南路太息曰得此歸
不悔無成翁曰此何難乃折堦前竹葉置圖上渭水
中謂陳曰注目於此如願矣季卿熟視卽渭水波濤
洶湧一舟甚大恍然登舟其去極速行次禪窟寺題
詩云霜鐘鳴時西風急亂鴉又望寒林集此時輟棹
悲且吟獨對蓮花一峯立明日次潼關又作詩題之

古今圖書集成
末句云已作羞歸計還勝羞不歸踰旬至家兄弟妻
子迎見甚喜信宿謂其妻曰我試期已迫不可久留
乃復進棹又作詩別其妻云酒至添愁飲詩成和泪
吟颺然而去家人輩皆驚爲鬼物矣陳忽復至渭水
經趨青龍寺山翁尚擁褐而坐僧猶未歸季卿謝曰
豈非夢耶翁曰他日自知經月家人來訪具述所以
題詩皆在

咸寧縣志唐昌觀內有玉蘂花爲唐昌公主植每中
春花發若瓊林瑤樹觀者如堵忽一日有少年女郎
衣繡綠衣峨髻瑤環容色婉約從二三女侍皆緋頭
黃衫端麗無比下馬詣花所異香襲人聞數十步觀
者疑出自宮掖莫敢偏視久之令小婢取花數莖而
出將乘馬顧黃冠者曰曩有玉峰之約自此可以行
矣登轡百步有輕風擁塵而去觀者覺烟霏鶴唳景
物輝煌須臾視之已在半天矣餘香經月不散
京城務本坊西門鬼市也每風雨暝晦聞喧聚聲秋
冬夜多聞賣乾柴云是枯樹精也或聞吟云天街鼓
絕行人歇九衢茫茫空有月又云九衢生人何勞勞

長安土盡槐根高

工部郎張周封舊莊狗狎嘴西常築牆犯太歲一夕
盡崩張咎其基虛工不到率莊客復築之高未數尺
炊者驚叫曰怪作矣遽視之飯數斗悉躍出蔽地著
牆勻若蠶子無一粒重者蠹牆之半如界焉因詣巫
酹地謝之亦無他焉

蒲城縣志金天會戊申正月有紅巾十萬攻城危甚
忽大兵至破賊時統兵烏魯大王憩兵同州界八魚
井見老翁馳白馬汗如洗詣軍門告急莫知爲誰忽

有人曰城隍廟塑馬迄今有汗乃知告急者神也
邵陽縣志明成化二十一年有莘里民王興左手大
指甲內有紅紋每雷雨輒盤旋如龍興欲剝去之龍
乃見夢云三日後當去至期雷雨大作龍果裂甲而
去

澄城縣志嘉靖庚寅夏玉泉子面生惡瘡數日瘡且
腫潰煩亂如祟忽自誦曰鬼火三更夜鵲聲二月天
又土埋千古恨月照一天愁又窮猿悲夜月孤鴈唳
秋風又孤窳荒墳空夜夜琪花瑤草自年年悽惋之

古今圖書集成
詞誦不絕口家人不能悉記俄而索水或以椀水與之一吸而盡又大聲誦曰飲瀑布之清冽迴膏肓之沉痾已卽瞑目而臥須臾瘡腫消而甦矣詢以前事茫然莫知也辛卯夏六月罹內人之變識其日正誦詩時也人以爲鼓盆之讖

孫嘉士負時名屏絕家務閉戶讀書夜半忽聞人語云天有五星兮晦明不一地有五岳兮高卑不齊草木兮夭喬鳥獸兮走飛生人造化兮一定而不可移開戶視之惟有山谷沈淒涼風響答而已知其神告

我也遂以義命自安

杜冕五歲不能言嘗矚母飼鷄一旦忽發聲曰牖下鷄啖糟糠不能振翮鳴朝陽亦當鼓翼上扶桑

咸寧縣志嘉靖二十四年冬別駕王濯征未第時同二三友人丙夜過秦邸見一巨人從東蹒跚來高三丈餘衣鶉百結若乞者狀至蕭牆東南隅扶牆內望若有太息聲越明年一宗室出門又見一巨人從北著白衣白幘耳有鏗高二丈餘兩目炯炯火光射地望南去

吉給諫時爲諸生時讀書城隍廟偶暮歸出及廟門已道無行人忽聞門下若有人言去得否徐伺之乃門旁二泥鬼言也須臾二鬼下臺倚肩笑語東向行時因尾之一鬼曰勿高言解元在後尋至一人家叩門卽開以納時疑此實鬼物何延之入也因記其處次日往訊之主人言有女得疾每起鼓後如鬼壓狀卽迷不醒至五更方甦今已減食骨立矣公能救之耶時心會卽令取硃紙爲書吉解元在此五字付貼牀頭女病尋愈後時果獲省解

